
PWYLLGOR CRAFFU GOFAL DYDD IAU, 12 MEDI 2019

Yn bresennol: Y Cynghorydd Dewi Wyn Roberts (Cadeirydd)
Y Cynghorydd Beth Lawton (Is-gadeirydd)

Y Cyngorwyr: Menna Baines, Annwen Daniels, Annwen J Davies, Alan Jones Evans, Linda Ann Jones, Eryl Jones-Williams, Gareth T M Jones, Dafydd Owen, Angela Russell.

Swyddogion yn bresennol: Vera Jones (Rheolwr Gwasanaeth Democratiaeth ac Iaith) a Siôn Owen (Swyddog Cefnogi Aelodau).

Yn bresennol ar gyfer eitem 5 isod:

Aled Davies (Pennaeth adran Oedolion, Iechyd a Llesiant), Bethan Richardson (Swyddog Cefnogi Busnes a fu'n arwain Ymchwiliad Craffu Cefnogi Pobl Anabl Gwynedd)

1. YMDDIHEURIADAU

Y Cyngorwyr R. Medwyn Hughes, Olaf Cai Larsen, Peter Read

2. DATGAN BUDDIANT PERSONOL

Datganodd y Cynghorydd Eryl Jones-Williams fuddiant personol yn Eitem 5 - Adroddiad Ymchwil Cefnogi Pobl Anabl yn Gwynedd - oherwydd bod ei wraig yn defnyddio cadair olwyn.

'Roedd o'r farn ei fod yn fuddiant sydd yn rhagfarnu a bu iddo adael y cyfarfod yn ystod y drafodaeth ar yr eitem.

3. MATERION BRYD

Ni dderbyniwyd unrhyw faterion brys.

4. COFNODION

Llofnododd y Cadeirydd gofnodion y cyfarfod blaenorol o'r Pwyllgor hwn a gynhaliwyd ar 26 Mehefin 2019, fel rhai cywir.

5. ADRODDIAD YMCHWIL CEFNOGI POBL ANABL YN GWYNEDD:

Ymneilltuodd y Cynghorydd Dewi Wyn Roberts o'r gadair er mwyn cyflwyno'r adroddiad gan ei fod yn gadeirydd yr Ymchwiliad Craffu. Bu i'r is-gadeirydd gadeirio'r eitem hon.

Cyflwynwyd adroddiad terfynol Ymchwiliad Craffu: Cefnogi Pobl Anabl Gwynedd (Gwasanaeth Cadeiriau Olwyn) gan gadeirydd yr ymchwiliad, y Cynghorydd Dewi Roberts. Nododd fod yr ymchwiliad wedi codi'r llen ar wasanaeth darparu cadeiriau olwyn y Gwasanaeth Iechyd Cenedlaethol ar gyfer gogledd Cymru. Ychwanegodd fod y problemau a adnabuwyd wedi eu rhannu gyda'r Gwasanaeth Iechyd a bod ymateb i ganfyddiadau'r ymchwiliad wedi ei dderbyn a'i gynnwys fel atodiad i'r adroddiad. Wrth gloi nododd fod gwelliannau i'r gwasanaeth wedi eu gwneud yn barod, gan gynnwys gwella cydweithio gyda swyddogion iechyd galwedigaethol. Diolchodd i'r Swyddog Cefnogi Busnes am ei gwaith,

ac i'r Gwasanaeth Iechyd am eu cydweithrediad. Gwahoddwyd cwestiynau a sylwadau gan y Pwyllgor.

Mynegwyd braw a phryder am y rhestrau aros am gyfarpar a chadeiriau olwyn. Mewn ymateb nododd cadeirydd yr ymchwiliad fod nifer o ffactorau yn cyfrannu at yr amseroedd aros. Ymysg y ffactorau oedd y cyfnod amser aros er mwyn i therapydd galwedigaethol ddod i asesu cartrefi. 'Roedd yn bosib i'r Cyngor gynnig cymorth i wneud y gwaith, ond byddai angen sicrhau cyfathrebu effeithiol pe bai hynny'n cael ei weithredu.

Ffactor arall oedd yn cael effaith ar yr amser oedd yn ei gymryd i ddarparu cadeiriau olwyn oedd y gallai cyflwr y defnyddiwr newid yn y cyfnod rhwng asesiad a chyflenwi'r gadair. Pwysleisiwyd fod y gwasanaeth oedd yn cael ei gynnig i gleifion pediatrig yn cymryd llai o amser, a bod hynny wedi ei adlewyrchu yn ystadegau perfformiad y gwasanaeth. Ychwanegwyd bod posibilrwydd cryf bod ystadegau perfformiad y gwasanaeth yn cuddio nifer fawr o gwynon anffurfiol gan mai dim ond y cwynion swyddogol oedd wedi eu cofnodi.

Nodwyd bod y maes darparu cadeiriau olwyn yn un arbenigol, a bod problemau dybryd yn medru codi pe nad oedd cadair olwyn yn ffitio'n iawn. Sut oedd cyrraedd targedau perfformiad heb gyfaddawdu safon y ddarpariaeth?

Mewn ymateb nododd cadeirydd yr ymchwiliad mai cwestiwn i Fwrdd Iechyd Betsi Cadwaladr oedd hwnnw. Ychwanegodd y Swyddog Cefnogi Busnes mai prif fwrriad a chanfyddiadau'r ymchwiliad oedd amlygu bod problem yn bodoli, gan drosglwyddo'r awenau i bwyllgorau'r Bwrdd Iechyd er mwyn gwneud gwaith pellach.

PENDERFYNWYD:

**Derbyn adroddiad Ymchwiliad Craffu: Cefnogi Pobl Anabl Gwynedd (Cadeiriau Olwyn), gan gyflwyno ei argymhellion i'r Aelodau Cabinet perthnasol .
Monitro cynnydd ar weithredu yr argymhellion wedi 6 mis.**

Dechreuodd y cyfarfod am 10.30 a daeth i ben am 11:10

CADEIRYDD